

蒸九晒，瓶收。每日空心酒吞七十粒，卧时再服。集简方。

叶

【主治】烧灰，入面膏，治皴瘡，灭癩痕，殊效。苏颂。

卫矛

【释名】鬼箭、神箭。



【气味】甘，寒，无毒。

【主治】女子崩中下血，腹满汗出，除邪，杀鬼毒蛊疰。本经。中恶腹痛，去白虫，消皮肤风毒肿，令阴中解。别录。疗妇人血气，大效。苏恭。破陈血，能落胎，主百邪鬼魅。甄权。通月经，破癥结，止血崩带下，杀腹脏虫及产后血咬腹痛。大明。

【附方】新二。产后败血儿枕块硬，疼痛发歇，及新产乘虚，风寒内搏，恶露不快，脐腹坚胀。当归散：用当归炒，鬼箭去中心木，红蓝花各一两。每服三钱，酒一大盏，煎七分，食前温服。和剂局方。鬼疰日发鬼箭羽、鲛鲤甲烧灰各二钱半，为末。每以一字，发时喘鼻。又法：鬼箭羽末一分，砒霜一钱，五灵脂一两，为末。发时冷水服一钱。并圣济总录。

山矾

【释名】芸香、椴花、柘花、场花、春桂、七里香。



【气味】叶：酸，涩，微甘，无毒。

【主治】久痢，止渴，杀蚤、蠹。用三十片，同老姜三片，浸水蒸热，洗烂弦风眼。时珍。

南烛

【释名】南天烛、南烛草、男续、染菽、猴菽草、草木之王、惟那木、牛筋、乌饭草、墨饭草、杨桐，赤者名文烛。

枝叶

【气味】苦，平，无毒。

【主治】止泄除睡，强筋益气力。久服，轻身长年，令人不饥，变白却老。藏器。

【附方】旧二。一切风疾久服轻身明目，黑发驻颜。用南烛树，春夏取枝叶，秋冬取根皮，细剉五斤，水五斗，慢火煎取二斗，去滓，净锅慢火煎如稀饴，瓷瓶盛之。每温酒服一匙，日三服。一方：入童子小便同煎。圣惠方。误吞铜铁不下。用南烛根烧研，熟水调服一钱，即下。圣惠方。

子

【气味】酸，甘，平，无毒。

【主治】强筋骨，益气力，固精驻颜。时珍。

五加

【释名】五佳、五花、文章草、白刺、追风使、木骨、金盐、豺漆、豺节。



根皮同茎

【气味】辛，温，无毒。

【主治】心腹疝气腹痛，益气疗疔，小儿三岁不能行，疽疮阴蚀。本经。男子阴痿，囊下湿，小便余沥，女人阴痒及腰脊痛，两脚疼痛风弱，五缓虚羸，补中益精，坚筋骨，强志意。久服，轻身耐老。别录。破逐恶风血，四肢不遂，贼风伤人，软脚臂腰，主多年瘀血在皮肤，治痹湿内不足。甄权。明目下气，治中风骨节挛急，补五劳七伤。大明。酿酒饮，治风痹四肢挛急。苏颂。作末浸酒饮，治目僻眼瞤。雷菽。叶：作蔬食，去皮肤风湿。大明。

枸杞、地骨皮

【释名】枸椽、枸忌、枸棘、苦杞、甜菜、天精、地骨、

